

四庫全書

集部

欽定四庫全書

集部  
唐宋元名表卷上之一

詳校官中書<sub>臣</sub>李采

侍讀<sub>臣</sub>孫球覆勘

總校官編修<sub>臣</sub>王燕緒

校對官編修<sub>臣</sub>邱慶澂

謄錄監生<sub>臣</sub>談雋

欽定四庫全書

集部八

唐宋元名表

總集類

提要

臣等謹案唐宋元名表二卷明胡松編松有  
滁州志已著錄明史松本傳稱松幼嗜學嘗  
輯古名臣章奏今未見其本是編乃松督學  
山西時選為士子程式之書雖所錄皆各集  
所有無竒秘未睹之篇而去取極為不苟前有

自序曰是學也昉於漢魏六朝盛於隋唐而  
極於宋其體不能盡同然其意同于宣上德  
而達下情明已志而述物則其後相沿猥下  
競趨新巧爭尚衍博往往貪用事而晦其意  
務屬詞而減其質蓋四六之本意失之遠矣  
其言頗為明切自明代二場用表而表遂夷  
為時文久而偽體雜出或叅以長聯如王世  
貞所作一聯多至十餘句如四書文之二小

比或叅以五七詩句以為源出徐庾及王駱  
不知徐庾王駱用之于賦賦為古詩之流其  
體相近若以詩入文豈復成格至於全用成  
句每生硬而杈桎間雜俗語多鄙俚而率易  
冠冕堂皇之調剽襲者陳膚餽釘割裂之詞  
小才者纖巧其弊尤不勝言松選此編挽頰  
波而歸之雅亦可謂有功於駢體者矣乾隆  
四十六年十二月恭校上

總纂官臣紀昀臣陸錫熊臣孫士毅

總校官臣陸費墀

唐宋元名表原序

說者曰表之言明也標也譬物之標表言標表事序要於章顯而已異駢儷之上也余竊以其言徒取一隅要未為通論今夫人之於文猶其之於言語之於衣服飲食與其宮室器用者也且夫言語之於達意衣服之於蔽體飲食之於滿腹宮室之於安身器物之於利用以今方古其可得而齊諸譬則四時之行萬物之生江河之流轉各因其時以為變故易曰損益盈虛與時偕行

自天地且不能違時而况於人乎故善學者從今之文以明古之道不善學者執古之跡以失今之宜斯其行之所以弗遠而施之則泥者也是學也妨於漢魏六朝盛於隋唐而極於宋彼其工拙繁簡駢儷直致要之其體不能盡同然其意同於宣上德而達下情明已志而述物則其後相沿猥下競趨新巧爭上衍博往往貪用事而晦其意務屬辭而滅其質蓋四六之本意失之遠矣今世士業文益又轉甚曾不深惟體裁之所從始勉

思構撰而乃擬拾補綴勦竊沿襲是曾弗若直致之為  
章明較著也余是用悲乃輯斯以式晉士要使學者敦  
尚本實優游道藝期可愛而傳爾或者弗察以為斯特  
文詞之華而已是非士所先過矣夫召賓客者必善其  
辭命告氓黎者必悉其志慮矧乎以詔君上以交鬼神  
以諭邦國以動天地而可弗脩其辭乎傳曰脩辭立其  
誠所以居業也故夫以唐宋之體裁陳虞夏之謨典用  
休文之聲律寫孔明之忠義神而明之存乎其人此則

不穀之所深望抑亦吾黨所當自勗者哉時嘉靖壬寅  
夏五月望日前山西按察司提學副使滁陽胡松識

欽定四庫全書

唐宋元名表卷上之一

明 胡松 撰

唐

為宰相賀雪表 韓退之

臣某言臣伏以去歲冬間雨雪頗少今年春首宿麥未  
滋陛下深念黎氓屢形詞旨神監昭達皇情感通春雲  
始繁時雪遂降實豐穰之嘉瑞銷癘疫於新年東作可

金少府人ノ三ノ一  
卷上之一  
期南畝有望此皆陛下與天合德視人如傷每發聖言  
則獲靈眈見天人之相應知朝野之同歡臣等職在燮  
和慙無效用覩斯慶澤實荷鴻休

為裴相公讓官表

臣某言伏奉今日制書以臣為朝議大夫守中書侍郎  
同中書門下平章事承命驚惶魂爽飛越俯仰天地若  
無所容臣某誠惶誠恐頓首頓首臣少涉經史粗知古  
今天與朴忠性惟愚直知事君以道無憚殺身慕當官

而行不求利已人以為拙臣行不疑元和之初始拜御  
史旋以論事過切為宰臣所非移官府廷因佐戎幕陞  
下恕臣之罪憐臣之心拔居侍從之中遂掌絲綸之重  
受恩益大顧已益輕苟耳目所聞知心力所迨及少闕  
政理輒以陳聞於裨補無涓埃之微而讒謗有丘山之  
積陛下知其孤立賞其微誠獨斷不謀獎待踰量臣誠  
見陛下具文武之德有神聖之姿起中興之宏圖當太  
平之昌厯勤身以儉與物無私威怒如雷霆容覆如天

地實羣臣盡節之日才智效能之時聖君難逢重德宜  
報苦心焦思以日繼夜苟利於國知無不為徒欲竭愚  
未免妄作陛下不加罪責更極寵光既領臺綱又毗邦  
憲聖恩所厚兇逆所讎關於防虞幾至斃蹈恩私曲被  
性命獲全忝累祖先玷塵班列未知所措祇自內慙豈  
意陛下擢臣於傷殘之餘委臣以燮和之任忘其陋汙  
使佐聖明此雖成湯舉伊尹於庖厨高宗登傅說於版  
築周文用呂望於屠釣齊桓起甯戚於飯牛雪恥蒙光

去辱居貴以今準古擬議非倫陛下有四君之明行四君之事徵臣無四子之美獲四子之榮豈可叨居以彰非據方今干戈未盡戢夷狄未盡賓麟鳳龜龍未盡游郊藪草木魚鼈未盡被雍熙當大有為之時得非常人之佐然後能上宣聖德以代天工如臣等類實不克堪伏願博選周行旁及巖穴天生聖主必有賢臣得而授之方可致理乞廻所授以叶羣情無任懇款之至

賀甘雨表

陛下慮深稼穡憂切烝黎未成旱魃之虞已積憂勤之意密雲與綸言繼發時雨將天澤盈流瑞鳥迎舟式掩商羊之舞蛇醫納甕果符埴鸛之鳴初泛洒於上官遂滂霈於率土自中徂外皆荷生成雨公及私靡不碩茂野夫鼓舞知帝力之玄通官吏懽呼見天心之默喻殷后徒勤於自剪周公空媿於舞雩化超前聖道貫重玄臣某才術無聞謬司邦甸生成必資於帝力進退何補於天工沐浴太和慙荷無極臣之欣躍倍萬恒情

賀甘露表

玄化升聞靈貺昭答必呈尤異之應以告天地之和臣  
誠惶誠恐頓首頓首伏惟皇帝陛下均煦育之功敷滂澍之澤太  
和潛達闕瑞克彰發於天霄特降宮樹朝光初燭方湛  
湛而未晞晨景轉炎更灑灑而未已綴葉而珠璣積耀  
盈噐而冰玉呈姿芳襲椒蘭味兼飴醴然則零於庭而  
著異紀於年以標竒徒誇往辰孰並茲日況樹有丁香  
之珍殿即延和之號所以著芳風之遠播期聖壽於無

疆事絕古今慶傳遐邇臣謬承渥澤獲覩殊祥抃躍之誠倍萬恒品

賀嘉禾表

陛下睿謀廣運神化旁行植物知仁祥圖應聖靈嶽不愆於贊祐燕谷遂用於生成豐稔既均知朔南之被澤休嘉允叶見天地之同和六穗慚稱於漢臣異畝恥書於周典自中形外均慶同懼臣無任抃躍之至

賀雨表

臣某言臣聞聖人之德與天地通誠發於中事應於外  
始聞其語今見其真臣誠懼誠喜頓首頓首伏以季夏  
以來雨澤不降臣職司京邑祈禱實類青天湛然旱氣  
轉甚陛下憫茲黎庶有事山川中使纔出於九門陰雲  
已垂於四野龍神效職雷雨應期雷或作雲嘉穀奮興根葉  
肥潤抽莖展穗不失時宜人和年豐莫大之慶微臣幸  
蒙寵任獲覩殊祥慶抃懼呼倍於常品無任踴躍之至  
謹奉表稱賀以聞

禮部為百官上尊號表 柳宗元

臣某言伏以聖王之纂承天位也臣子必竭懇誠獻尊號安敢為佞禮在其中一則以告天地神祇二則以奉宗廟社稷三則以安華夏蠻貊巍巍大稱其可廢乎臣等誠懼誠望頓首頓首伏惟皇帝陛下叶周文之孝德齊夏禹之約身弘帝堯之法天過殷湯之解網未逾周月四海將致於時雍甫及元正率土更欣於再造然神人之願億兆之情有所不安率謂未盡善者以為帝德

廣運而尊號猶闕郊廟備禮而祝嘏無辭凡百兢兢懷華  
夷屬望臣謹按昔皋陶之頌舜伊尹之頌湯皆臣子至  
公面揚君父以敷於當代以播於無窮夫豈飾哉率由  
事實帝王尊號皆漸於此皇家光被四表祖宗烈文時  
當太和尊號表德耳目所接簡牘斯存稽之於前典則  
如彼考之於聖朝又如此今龜筮習吉元正戒期當品  
物惟新之時乃皇王大禮之日陛下郊天地享宗祧陰  
陽協和動植交暢不建至尊之稱恐違列聖之心所以

臣等冒死陳聞請上徽號伏惟陛下小謙讓之節安延  
企之情特詔名儒禮官百寮庶尹詳明故實議崇聖德  
則人望允厭神心獲安山川效靈光贊無疆之壽祝史  
陳言永彰不朽之功臣等蒙國寵榮備位班列無任懇  
望之至

禮部賀冊尊號表

臣某伏奉月日制陛下膺受尊號率土臣子慶抃無窮  
臣聞立極之大四海無以報神功配天之尊萬物不能

崇聖德唯有徽號是彰中興所以上探天心下極人欲

中謝

伏惟元和聖文神武法天應道皇帝陛下統承千  
載光被六幽蝨賊盡除福應皆集有首有趾咸識太平  
勲臣增爵祿之榮戎士加賞延之寵片善必錄微功盡  
昇獨惟聖謩事絕酬答萬國缺望百工怨思是以啓元  
和之盛典延昊穹之景祚理厯凝命實曰聖文和衆定  
功時惟神武運行有法天之用變化乃應道之方鬼神  
協謀華夏同志大禮既建鴻恩遂行歡呼遠布於九圍

滲漉普周於八裔慶超邃古美冠將來臣獲守蠻荒遠承大典潢汙比陋河清幸遂於千年塵壤均微山呼願同於萬歲無任慶賀屏營之至

為京兆府請復尊號第三表

臣某言臣伏以耆老等並發丹誠將貫白日請復徽號以光聖謨臣以其懇款自中不可禁止遂抗表陳情備述微誠伏奉墨詔批答未蒙允許者衆心尚阻天意未從懇迫愈深兢惶無措臣某伏惟皇帝陛下道大益謙

化成彌損雖江海善下每應朝宗之心而日月居高久  
稱照臨之位况復上承天命下觀人誠若然辭之理有  
不可伏以陛下功參造化政體乾坤萬邦宅心百靈效  
職此聖之至也明並兩曜信如四時先天不違窮神知  
化此神之極也道德純備禮樂興行宸翰動於三光睿  
藻窮於六義此文之備也五兵不試七德咸宜殊方者  
知歸負固者率服此武之成也黃龍皓兔甘露慶雲神  
禾嘉瓜祥蓮瑞木萬物暢遂百穀茂滋此天之至靈也

黎老斑白伏守闕庭鰥嫠童幼歌謠道路此人之至誠  
也有其德而無其號拒乎天而違乎人雖陛下謙讓之  
至美抑非臣心之所安也伏以賤志難明微誠莫達戴  
天彌懼履地益慚無任懇迫屏營之至伏願早建大號  
以稱天人之心謹再奉表昧死陳請以聞

為耆老等請復尊號第二表

京兆府長安縣耆老臣石靈等言伏奉墨詔批臣所請  
復尊號未蒙允許者捧對惶懼不知所裁天實命之於

臣何有臣等誠懇誠懼頓首頓首臣聞聖君以奉天為  
心不以執謙為德以順人為大不以崇讓為優陛下深  
拒天人之誠猶懷謙讓之道臣等愚惑不知所歸且百  
祥淳臻特表昊穹之眷五穀蕃熟用彰后土之勤億兆  
嗷嗷籲天請命上下交應幽明同心舉而違之臣所不  
識况臣等共被仁育同臻太和陛下德達上玄以豐人  
之衣食道躋壽域以延臣之歲年沐浴皇風二十餘載  
兒童感化鰥寡知恩故臣等出鄉之時閭里勉臣以不

進不止妻孥誓臣以不復不歸唯竭血誠退無面目便  
當隕首闕下終不徒還伏惟陛下照臣懇迫之情哀臣  
羸老之命臣等不勝嗚咽慙恨之至謹奉表陳謝以聞

禮部為文武百寮請聽政第二表

伏奉大行皇帝知陛下至性自天恐陛下執哀過毀上  
惟九廟之重下念萬務之殷故遺詔丁寧俾遵舊典今  
百辟卿士顯然在庭瞻望清光已七日矣固陳誠請猶  
未允從內外憂惶莫知所出臣聞大孝之本繼志為難

酌禮之情得中為貴是以哀迷期數哭泣有常俯而就  
之聖人所重知難繼也君子不為伏願少抑哀懷仰尊  
理命以副神祇之望以安億兆之心光祖業於無窮流  
德化於天下凡在臣子孰不悲戴

又第二表

臣某等言臣聞聖凡殊塗邦家異禮故王者舍已從物  
用身許天雖居達喪猶以事奪伏以大行皇帝道成鑄  
鼎僊等御龍萬姓長號九有顛望陛下以聰明睿聖嗣

守寶圖爰及宅憂迨茲累日而孝思罔極尚輟乃雍之言庶政未釐頗闕如絲之命臣等嘗覽載籍粗知喪紀若成周顧命歷代猶遵西漢詔音前王所奉我國家以孝理天下文明應期止用此法胥以傳授蓋事歸至當則不可不遵禮貴從宜則不得不守理固然也臣等是以上陳愚懇輕瀆宸嚴冀遂血誠俯親國政而陛下執喪逾切聽理未聞億兆嗷嗷不知所訴臣以為天子之孝在於保安社稷司牧蒸黎功超百王慶流萬代亦何

必守臣下之小節茂皇王之大猷固阻羣情務成謙德  
伏願以遺詔為念奪在疚之懷就臨軒之制天下幸甚

第三表

伏以萬幾至重遺旨難違再獻表章上塵旒宸精誠徒  
竭天意未迴內外遑遑人神企望臣聞王者之孝異於  
匹夫禮不相沿道資適變當承平之代故殷帝宅憂而  
不言遇有事之時則周王未葬而誓衆况今戎車猶駕  
邊堠多虞兩河之寇盜難除百姓之瘡痍未合亂者思

理危者求安天下嗷嗷正在今日誠宜抑其至性以副羣心成先帝之大功繼中興之盛業豈可寢苦啜泣庶政闕然九廟之靈何報萬方之望何塞臣等職叅樞近誠切邦家若陛下未忍臨軒尚持前志臣等有死而已不敢奉詔不勝哀迫懇切之至

賀踐阼表

臣某言太子中舍嚴公弼至奉某月日勅書慰諭伏承陛下以某月日虔奉典冊允昇寶位凡在羣生孰不慶

幸臣某誠懼誠忤頓首頓首臣聞天地泰而聖人出雷雨解而品物榮是以五行迭用木火更其位十葉重光宗廟輔其德殷宗恭默再造成湯之業漢文聰明克承高祖之緒陛下重離出曜體乾繼統主鬯彰孝恭之美撫軍著神武之功欽承遺訓永保鴻業過密之中施雨露以被物遐邇之地覩日月之繼明則四維之外八極之表人神昏悅草木皆春煦嫗生成不失覆載况臣謬膺藩守累受國恩爰自出身洎乎領鎮沐浴聖澤優游

昌時不獲觀闕庭之禮展臣庶之分戴天賀聖倍萬恒  
情

禮部賀永貞元年表

臣某等言伏奉今日誥今月九日冊皇帝改貞元二十  
一年為永貞元年自貞元二十一年八月五日昧爽以  
前應犯死罪特降徒流以下遞降一等者寶命方始  
聖歷周彰載宣臨照之明遂施渙汗之澤臣某等誠懼  
誠賀頓首頓首伏以重光下濟積慶旁行漢祖推奉教

之尊文王遂無憂之志正名紀厯表運行於萬方宥過  
輕刑流汪濊於四海歡呼雀躍遐邇攸同臣某等親奉  
聖謩仰承大化踴躍之至倍萬恒情無任蹈舞欣慶之  
至

禮部太上皇誥宜令皇帝即位賀表

臣某等言伏奉今日太上皇制命陛下即皇帝位光奉  
寶圖丕承鴻業普天率土歡慶難勝臣某等誠喜誠忭  
頓首頓首臣聞皇建其極存諸大訓帝出於震著在易

經繼明以照於四方重熙以臨於萬國動植品類永賴  
昭蘇山川鬼神咸用欣戴臣某等獲備班列親仰聖明  
踴躍之誠倍萬恒品無任云

禮部賀立皇太子表

臣某等言伏奉今月日制廣陵郡王宜冊為皇太子改  
名某仍令所司擇日備禮冊命者天序有奉皇圖載寧  
臣某等誠慶誠賀頓首頓首臣聞商書載以貞之文漢  
史傳早建之議不惟立愛其在繼明陛下奉率前規敷

揚盛典顧茲守器之重爰正承華之位尊義方之教載  
錫嘉名崇建樹之禮式光典命以長而立自符於慎擇  
必子之選遂合於至公邦本不搖王業彌固此皆宗社  
垂祉啓佑皇心乾坤合謀保安聖運足以播休氣於四  
海洽太和於萬靈食毛含齒所同歡慶臣等奉承制命  
蹈舞周行踴躍之情倍萬恒品無任慶忭感悅之至  
禮部賀皇太子冊禮畢德音表

臣某等言伏奉今日制皇太子冊禮云畢思與萬方同

其惠澤者盛典斯舉鴻恩遂行凡在率土不勝抃躍臣  
某等誠喜誠賀頓首頓首伏惟皇帝陛下克奉神休以  
正邦統建天下之本宗廟以安致萬國之貞兆人攸賴  
典冊既備慶澤載流既廣愛而推恩亦好生而布德緩  
刑而囹圄知感進勲而嗣續增榮崇教諭之方忠良是  
舉嚴贊襄之禮賜與有加旌孝弟以厚於人倫敬鬼神  
而修其祀事况行禮之日則屏翳收蹟太陽宣精用彰  
出震之休更表重離之曜神化旁暢皇風遠揚自華及

夷異俗同慶臣某等謬叅著定倍百恒情無任懽慶踴躍之至

為王京兆皇帝即位禮畢賀表

臣某等言臣聞大人繼明百神所以受職天子有道萬國由是承風伏以皇帝陛下纘聖垂休順時御極負宸而會朝夷夏踐阼而統和天人幽明感通遐邇昭泰遂使祥光下燭嘉氣旁通周王謝流火之符魯史愧書雲之典食毛含齒懽忭無窮臣某等幸覩昌時獲奉大慶

踴躍之至倍萬常情無任蹈舞欣躍之至

代韋中丞賀元和大赦表

臣某言伏奉正月二日制大赦天下永貞三年宜改元  
和元年太陽既昇煦育資始霈澤斯降膏潤無遺臣某  
誠慶誠賀頓首頓首伏惟皇帝陛下仁化旁流孝理弘  
闡紀元示布和之令肆眚見恤人之心曠然滌瑕得以  
遷善渙發大號申明舊章農有薄征市無強賈勲勤是  
錄爵秩以班寵寧間於幽明澤必周於夷夏近甸輕權

酤之入遠人忘水旱之災既行慶於官寮亦推恩於天  
屬諸生喜黌塾之廣庶老加絮帛之優量入所以備凶  
興廉期於變俗爰褒有客尊賢之典惟新載奉素王宗  
子之道斯在綸言一降庶政畢行懷生之倫感悅無量  
臣某等守在遐遠親奉詔條踴躍之誠倍百恒品無任  
感恩抃舞屏營之至

禮部賀冊太上皇后賀表

臣某等言伏奉今日誥良娣王氏冊太上皇后良媛

董氏冊太上皇德妃宜令所司備禮冊命者母儀有光  
坤道克順陰教方行於萬國內理克和於六宮臣某等  
誠慶誠賀頓首頓首伏惟皇帝陛下對若天休奉揚睿  
旨長秋既登其正位禴翟亦被於恩光奉養見三朝之  
安周旋有四星之輔豈獨配天稱大助日為明所以表  
王化之源知孝弟之本冠映千古儀刑四方臣某等捧  
戴施行踴躍無地無任蹈舞欣喜之至

禮部賀太上皇后冊畢賀表

臣某等言今日太上皇后冊禮云畢率土臣妾慶抃  
無窮臣某等誠慶誠賀頓首頓首伏以太上皇后著虞  
嬪之至德嗣周母之徽音表率六宮明彰萬國陛下克  
修理本以暢化源坤道知事地之方人倫識尊親之大  
豈惟婦順斯備陰禮用修其以播正始於國風致時雍  
於帝典臣某等謬塵榮位獲覩盛儀踴躍之誠倍百恒

品

賀皇太子牋

某言伏奉月日制書殿下祇膺茂典位副清宮溫文光  
三善之名繼照協重離之慶萬葉固本羣方宅心含生  
之徒孰不欣戴况某夙蒙期獎職在藩方懼忤之誠倍  
萬恒品

御史臺賀嘉禾表

臣某言今日宰臣以幽州所進嘉禾圖各一軸示百  
寮者伏以嘉穀順成靈貺昭格天人合應遐邇同風臣  
某誠懼誠慶頓首頓首伏惟皇帝陛下睿謀廣運神化

旁行植物知仁祥圖應聖靈嶽不愆於贊祐燕谷用遂  
於生成豐稔既均知朔南之被澤休嘉克叶見天地之  
同和六穗慙稱於漢臣異畝恥書於周典自中形外均  
慶同歡臣某謬職憲司獲覩休瑞無任抃躍之至

禮部賀嘉禾及芝草表

臣某等言伏見今月某日內出劍南所進嘉禾圖及陝  
州所進紫芝草示百寮者珍圖煥開瑞彩交映遐邇偕  
至福應攸同臣某等誠慶誠賀頓首頓首伏惟皇帝陛

下緝熙至道保合太和天為發祥地不愛寶嘉禾推質  
靈草抽英獻於王廷唐叔慙同穎之異存諸郊廟班史  
謝連葉之奇既呈蕤蕤之祥更覩煌煌之秀豐年斯著  
聖壽用彰飲和之人懽忭無極臣某等優游至化披翫  
殊姿慶忭之誠倍萬恒品

京兆府賀嘉瓜白兔連理棠樹等表

臣某言今日日中使王自寧出徐州刺史張愔所進嘉  
瓜圖及白兔兒一併出陳許等州觀察使上官說所進

許州連理棠樹圖示百寮者惟天眷命是降百祥惟聖  
欽承用膺多福臣某誠慶誠賀頓首頓首臣伏以太和  
所烝至德斯應圖物獻瑞周於遠方神瓜合形式表綿  
綿之慶異棠連質用彰煜煜之榮况金風發祥白兔來  
擾告有秋之嘉應著成歲於神功雜還紛綸如山斯委  
人盡登於壽域物咸暢於薰風况臣特感深恩欣逢衆  
瑞踊躍之至倍萬恒情

禮部賀甘露表

臣某言中使王自寧至伏宣聖旨出延和殿前丁香樹  
甘露一大盒示宰臣未時又出一大盒令明日示百寮  
甘露見降未止者玄化升聞靈貺昭答必呈尤異之應  
以告天地之和臣某誠懼誠慶頓首頓首伏惟皇帝陛下  
下均煦育之功敷滲漉之澤太和潛達闕瑞克彰發於  
天霄特降宮樹朝光初燭方湛湛而未晞晨景轉炎更  
灑灑而未已綴葉而珠璣積耀盈器而冰玉呈姿芳襲  
椒蘭味兼飴醴然則零於庭而著異紀於年以標竒徒

矜往辰孰竝茲日况樹有丁香之珍殿即延和之號所以著芳風之遠播期聖壽於無疆事絕古今慶傳遐邇臣謬承渥澤獲觀殊祥抃躍之誠倍萬恒品

禮部賀白龍并青蓮花合懽蓮子黃瓜等表

臣某言伏見今日日內出滄州所進白龍見圖又出西內定禮池中青蓮花并神龍寺前合歡蓮子示百寮二十三日又出監州所進合懽黃瓜圖者二氣交泰萬國同和動植思協於殊祥遐邇必陳其嘉應披圖按牒聖

理彰明臣誠懼誠慶頓首頓首伏以天地非遠睿感必  
通疊瑞重祥累集宮禁池蓮表異靈化非常敷彼青光  
徵佛書而尤絕成其嘉實驗祥經而甚稀積慶旁流自  
中徂外遂使龍騰白質乘秋果應於金行瓜合黃中表  
聖更彰於土德遠通邈徼近出苑園合慶同歡周於億  
兆况復邦畿之內雨霽必時宿麥大穰嘉穀滋茂和風  
孕育靈氣陶蒸是皆發自帝心達於天意周流升降成  
此歲功惠被羣生自為嘉瑞臣某深惟多幸獲遇斯時

觀靈貺之備臻知人和之溥洽無任慶忭躍蹈之至

禮部賀白鵲表

臣某言伏奉進旨宣示前件白鵲者霜毛皎潔玉羽鮮  
明色實殊常性惟馴狎臣聞聖王之德無所不至有感  
則應無幽不通伏惟陛下恩霑動植仁洽飛翔故得茲  
禽呈休效質伏以白者正色式表金方鵲以知來式彰  
冠服用符歸化之兆克耀太平之階臣職叅禁垣獲覩  
嘉瑞無任慶抃之至

禮部賀嘉瓜表

臣某等今日內出浙東觀察使賈全所進越州山陰縣  
移風鄉百姓王獻朝園內產嘉瓜二實同蒂圖示百寮  
者寶祚惟新嘉瑞來應式彰聖德更表天心臣某等誠  
慶誠賀頓首頓首伏惟皇帝陛下保合太和緝熙庶類  
德馨上達神化旁行嘉瓜發祥來自侯服質惟同蒂見  
車書之永均地則移風知化育之方始雖七月而食豳  
土歌王業之難五色稱珍東陵詠佳賓之會未聞感通

若茲昭著者也臣某等遭逢聖運親仰珍圖抃躍之誠  
倍百恒品無任慶悅之至

為王京兆賀嘉蓮表

臣某言今日某時中使某奉宣聖旨出西內神龍寺前  
水渠內合歡蓮花圖一軸示百寮者祥圖煥開異彩交  
映贊天地之合德表神人以同歡臣某誠歡誠慶頓首  
頓首伏惟皇帝陛下道協重華慶傳種德陶陰陽之粹  
美孕造化之精英吉慶每見於天心發祥必自於禁掖

是使雙華擢秀連蒂垂芳香激大王之風影耀天泉之  
水煥開宮沼旁映給園靈貺應期天龍護聖寶曆夙超  
於小劫神功允洽於大千臣某獲覩昇平濫居榮寵聞  
瑞應而稱慶仰吉事而增歡無任抃蹈喜躍之至

為王京兆賀雨表

臣某言臣昨日面奉聖旨以近日少雨今月內無雨即  
須祈禱今日便降甘雨者天且不違神必有據密雲與  
綸言繼發時雨將天澤並流臣某誠歡誠慶頓首頓首

伏惟皇帝陛下憂切蒸黎慮深稼穡思彼未兆防於無  
形滲漉每出於湛恩變化必隨於廣運宸衷暫惕已矯  
御天之龍聖謨既宣遂洽漏泉之澤霽霽周布霏微四  
施黍稷盡成公私皆及野夫鼓舞知帝力之玄通官吏  
歡呼見天心之默喻臣某牧人京邑動仰皇靈渥澤徒  
加涓滴無助無任感悅屏營之至

王京兆賀雨表二

臣某言臣伏見今月二十四日時雨溥降伏以聖心積

念天意遽迴移造化之玄功草陰陽之常數臣某誠慶  
誠忭上言伏惟皇帝陛下仁育蒼生恩同赤子自頃天  
雨未降時稼或愆貶食齋戒至誠幽達又慮宿麥未備  
播種失時出於宸衷特令賑貸睿謨潛運甘雨遂周布  
濩垂陰隨聖澤而俱遠滂沱積潤與恩波而共深臣某  
才術無聞謬司邦甸生成必資於帝力進退何補於天  
工沐浴太和慙荷無極無任慶躍屏營之至

王京兆賀雨表三

臣某言今月十三日面奉聖旨緣自春來少雨宜即差  
官精誠祈禱者十四日臣便差官分赴靈跡其日雲陰  
四合至十五日甘雨遂降伏惟皇帝陛下言為神化動  
合天心未成早暵之虞已積憂勤之慮衆靈受職蒼蔚  
且隕於南山百穀仰榮滂霑霑遂霑於東作睿暮朝降膏  
澤夕周知天人之已交識陰陽之不測然則周王徒勤  
於方社殷帝虛美於桑林豈若無災而早圖未禱而先  
應化超前聖道貫重玄徧野同歡傾都相慶臣之欣躍

金少曰  
卷上之一  
倍萬恒情

王京兆賀雨表四

臣某言臣於三月二十九日奉聖旨於諸靈跡處祈雨至三十日甘雨遂降者臣聞惟聖有作先天不違發令而祥風已興致誠而玄液旋被臣某誠欣誠賀頓首頓首伏惟皇帝陛下側身防患道邁周王盡力勤人功超夏后聖謨廣運驅百靈以從風神化旁行滋五稼而流澤油雲四合膏雨溥周農壤遂一於肥磽滲漉盡霑於

遐邇蒸黎詠德知必自於聖心草木欣榮如有感於皇  
化有年之慶實在於斯臣以無能謬領京邑上勞宸慮  
運此歲功無任喜懼屏營之至

賀親自祈雨有應表五

臣某言臣得上都院官金部員外郎韓述狀報以時雨  
未降親自於龍堂祈禱有靈禽羣翔自成行列如隨威  
鳳以翼龍舟其日降雨者中謝伏以時或愆陽歲之常  
候式當聖日無害豐年陛下敦本務農憂人閔雨宸慮

所至天心自通故得瑞鳥迎舟掩商羊之舞仙雲覆水  
協從龍之徵初泛灑於上宮遂滂霈於率土自中徂外  
皆荷生成雨公及私靡不碩茂殷后徒勤於自翦周公  
空愧於舞雩臣以庸虛謬司垣翰有年之慶惟聖之功

臣某無任云

云

為裴中丞賀克東平赦表

臣某言伏奉月日德音以淄青蕩平褒功宥罪布告遐  
邇者臣聞肅殺之後每致陽和雷霆既施必聞膏澤伏

惟陛下體乾剛以運行叶坤元之翕闢百靈受職六合  
從風阻兵怙亂者必就梟擒懷忠抱義者無不甄錄激  
其效順特加旄節之榮寵以元功遂魚鼎鉉之任戎行  
窮賞賚之重死事極褒恤之憂劫脅之役盡除聚斂之  
名皆去傷痍受煦老疾加恩豐財已復其征徭賜種更  
盈於種稔嚴山川之祀神必有依申義烈之家物無不  
感周王推忠厚之化漢帝慙愷悌之風太平之德斯為  
至盛然則虞巡可復告成將慶於岱宗漢典方興講禮

再榮於闕里臣謬膺重寄獲觀太和抃蹈之誠倍萬恒  
品謹已施行郡邑宣示軍戎莫不動地歡呼若醉千鍾  
之酒騰天鼓舞如聞九奏之音無任慶賀踊躍之至

柳州賀破東平表

臣某言即日被觀察使牒李師道以月日克就梟戮者  
帝德廣運唐命惟新靈暄廓清天地貞觀率土臣庶慶  
忭無涯伏惟睿文聖武皇帝陛下威使百神德消六沴  
天降寶運時歸太平自克夏擒吳翦蜀平蔡殊類稽顙

羣疑草心唯此兇妖尚聞悖慢庭議既得廟謀必臧旌  
旗燭耀於洪河金鼓震驚於靈岳鄆城自潰寧同莒魯  
之爭齊地悉平無俟耿陳之戰五兵永戢七德無虧含  
生比堯舜之仁率土陋成康之俗介丘霧息已望翠華  
之來沂水風生更起舞雩之詠千歲之統實在於斯臣  
守在蠻荒獲承大慶抃躍之至倍萬常情

代裴中丞賀分淄青為三道節度表

臣某言伏見某月日制分淄青諸州為三道節度都團

練觀察等使者蛇豕之穴忽為樂郊氛沴之餘盡成和  
氣伏惟皇帝陛下天付昌期神開寶歷復昇平之土宇  
拔妖孽之根源自西自東不違於指顧我疆我理咸得  
其區分山川備臨制之形道塗適征徭之便俾侯既定  
賜履以寧異青兗之封爰從古制解曹衛之地實契雅  
謀車甲永藏馬牛勿用俗被雍熙之化代知仁壽之期  
農事載盛於耨芟儒風重興於俎豆足使季札觀魯更  
陳南籥之儀山甫徂齊復正東方之賦臣總戎遠地不

獲陪賀闕庭

云

為韋侍郎賀布衣竇羣除右拾遺表

臣某伏見今日日制除布衣竇羣右拾遺者臣聞直道  
之行四方嚮德逸人是舉天下歸心臣伏以竇羣肥遯  
居貞包蒙養正學術精果操行堅明讚詠道真以求其  
志頃守藩服特所委知及歸朝廷輒有聞薦庶逃竊位  
之責以塞曠官之尤豈謂天聽曲從瞽言無廢况諫諍  
之職政化是參擢於布衣久無其比周行慶抃林藪震

驚晦跡寧慮於遺賢懷才盡思於展效臣以性本庸疎  
動無裨益唯思進拔以報恩榮區區懇誠實貫金石言  
而不廢微臣敢效於薦雄德必有鄰聖代式光於尊隗  
自羣受命冀復面陳迫以疾病接於休假注心蓄念寤  
寐兢兢無任喜躍屏營之至

為樊左丞讓官表

臣某言伏奉今月二十八日制除臣尚書左丞寵命俯  
臨慙顏自失泛大鯨之海但覺魂搖戴巨鼇之山未如

恩重臣聞尚書百揆翊亮萬幾故天上尊北斗中樞陞  
下有南宮左轄晉昇孔坦諒直當時漢拜楊喬閑練故  
事庶得百寮有憚於會府諸侯取法於京師臣實謏才  
謬登清貫握蘭起草昔紊朝經剖竹頒條近貽人瘼備  
歷中外無聞聲彩版圖載輯貢賦未均於九州銅印更  
操威儀不檢於三署次郎補闕豈易其人聖主求才宜  
難此受切謂旁求俊乂側訪瓌竒必使德合準繩言成  
綱紀興化致理時無間言况安上必在於薦賢危身莫

踰於曠職倘蒙垂叔紫渙俯矜丹誠愚臣保陳力之言  
聖鑒有責成之地無任覩冒惶悚之極謹指朝堂奉表  
陳讓以聞臣所讓人別狀封進

為王戶部薦李諒表

臣某言臣聞知賢必進忠臣之大方擇善而居明主之  
要道况臣特受恩遇超絕古今報國之誠寤寐深切是  
敢竭愚臣之微分助陛下之至明恢張羽儀弘輔治化  
臣某誠惶誠恐頓首頓首切見新授某官李諒清明直

方柔惠端信強以有禮幹而甚文求之後來畧無其比  
臣自任度支等副使以諒為巡官未及薦聞至某月日  
荆南奏官勅下赴本道諒實國器合在朝行臣之所知  
尤惜其去伏望天恩授以諫官使備獻納冀他日公卿  
之任斯焉取斯則聖朝無乏士之名微臣緩蔽賢之罰  
無任誠懇屏營之至

代裴中丞謝討黃少卿賊表

臣某云云即日奉事官米蘭回伏奉手詔云云者臣聞

膚草既平雖疥癬而必去豺狼已斃在狐鼠而宜除臣  
某伏惟元和聖文神武法天應道皇帝陛下受命上玄  
底寧下土兇渠盡殄威武載揚蠢爾腥羶尚聞凌暴靈  
旗斜指銅獸俯臨三軍知必勝之方萬姓喜永清之路  
微臣忝司戎律親列顏行躡伏波之舊規乘下瀨之故  
事盡瘁事國期畢命於戈矛不宿於家思奮身於原野  
即以今日某時出師就道便披榛蹶石摩壘陷堅蕩清  
海隅永息邈徼竊以才非克國敢自贊於無踰志慕孟

公庶追蹤於不伐，謬承重委，寤寐含惶，無任感恩。隕越之至。

為裴中丞舉人自代伐黃賊表

伏以某官器宇端方，丰姿詳雅，謙虛內敏，籌畧共推。前佐湖南，悉心匡佐；後歷郡掾，深負政聲。惠愛在人，姦邪屏息。勤勞已著，幹蠹無倫。今黃賊尚據荒陬，犬巢未覆。倘以某代某之任，必能掃蕩氛祲，廓清海濱。竊惟斯人

雅堪厥職云

云

為崔中丞請朝覲表

臣歷刺三州連總二府外任逾紀入覲無階就日望雲  
魂飛心注伏惟睿聖文武皇帝陛下覆載無私遐邇同  
致復昇平之故事繼前聖之高蹤中外踐更出入迭用  
臣以虛薄叨受恩榮徒竭夙夜之心未申朝夕之敬天  
威咫尺誠寤寐而無違雲漢昭回固瞻仰而何及是以  
前在朗寧封章累上及移臨桂星紀屢周微衷尚隔於  
戴盆積望徒懸於窺管葵藿之誠彌切犬馬之戀逾深

人欲天從於茲未驗下情上達終冀不誣敢瀆宸嚴罄  
陳丹懇伏乞賜臣除替許至闕庭厠蹈舞於羣寮備班  
行於散地足趨中禁目覩大明俾成九族之榮以盡有  
生之幸非敢竊國賓五獻之禮希康侯三接之恩一覲  
龍顏萬死為足無任懇迫激切之至

代李愬襄州謝上表

捧讀絲綸慙悻無地拜命兢悚莫知所裁臣凡賤瑣才  
智畧無取幸賴先臣緒業累忝國恩天澤曲流遂司節

制寄深分閫任重專征顧無將領之才謬處衆人之上  
豈謂宸私軫念仁育為心霈澤無涯德音屢降士衆感  
悅咸思竭忠遂得潛師暗入賊境不意兇渠就戮此皆  
聖謀豈敢叨忝以為已力仰荷殊造重於丘山臣以日  
月上訖謹當敷宣皇化普諭聖慈綏撫三軍又安百姓  
冀以塵露上答鴻私臣

云

代韋永州謝上表

臣某言伏奉月日制書除臣永州刺史以月日到州上

訖受命若驚臨職彌懼臣以無能累更事任神州赤縣  
實所備嘗過量逾涯每深兢惕不謂聖恩推澤濫駕朱  
輪祿秩徒增詎施乳哺之惠服命虛受寧興襦袴之謠  
况此州地極三湘俗參百越左社居椎髻之半可墾乃  
石田之餘曠牧守於再秋彌驕獷俗代征賦於三郡重  
困疲人分災本出於一時積弊遂餘於十稔撫安未易  
知法出而奸生子育誠難懼力勞而功寡夙夜憂切不  
敢違寧庶當宣布天慈奉揚神化以日繫月倘或有成

少裨愷悌之風用答生成之造無任感恩隕越之至

柳州謝上表

臣某言伏奉詔書授臣柳州刺史以今月二日至郡上  
訖臣前歲以久停官秩去年蒙聖恩除替便欲裂裳裹  
足趨赴京師以舊疾所嬰彌年未愈逮及今夏始就歸  
途襄陽節度使于頔與臣早歲同官見臣當暑在道懇  
留在館尋假職名意欲厚臣非臣所願伏惟陛下光被  
之道德已洽於區中憂濟之勤心每徧於天下嘗以萬

邦共理必藉於循良一物不遺尚隆於體貌假臣寵渥  
重領方州駕駘復效於奔馳枯朽更同於華秀臣聞潢  
汙易竭抑有朝宗之願犬馬無識猶知戀主之誠揣分  
則然惟天知鑒况臣昔因左官一紀於外子牟馳心於  
魏闕汲黯積思於漢庭豈非夫人獨無斯戀去就者榮  
辱之主朝廷者仕進之源臣子之宜忠貞所志臣雖心  
同犬馬而分比潢汙華躡康衢意非徃蹇臣之此誠口  
不能喻意欲悉達文非盡言此臣所以自咎自恨復乖

志願猶冀苦心勵節上奉詔條惠寡恤貧下除人瘼恭  
宣皇化少答鴻私不勝欣幸之至

代廣南節度使舉裴中丞自代表

前件官器宇深沉天才間出爰從撫宇逮於察庶所職  
恪勤庶務皆勸日者安南夷獠反叛害其連帥毒痛黎  
人某皇帝以某威惠茂著自某州刺史俾之撫臨夙夜  
經行盡除戎器賊徒識恩黨衆歸義炎荒之俗靡不底  
寧後改鎮容州勲效彌顯澄清庶類邁德前修深負能

名合遷重鎮臣自惟凡懦不逮前人伏乞天恩廻授某  
非惟旌德亦是飾能庶微臣免尸位之憂某獲無私之  
舉

奉薦從事表

某績茂戎軒才優管記操刀必割豈謝剗犀落筆不休  
寧慙倚馬况早登科選夙洽時譚匪惟詞藝雙美抑亦  
器能多適比於流輩頗為滯淹輒敢薦陳伏希獎錄

代節度使謝出鎮表

鴻霈曲臨惶駭交集捧對綸綍不知所圖臣聞蕭曹佐漢六合為家真望匡周萬方同軌臣幸以芻蕘累忝殊榮天德薦臨遂加台政不能翊宣聖明增日月之光俾兇渠勦絕人用康寧實由臣不稱職使此艱患伐檀興議負乘招譏常懷覆餗之虞敢望專征之寄獻俘未遠展效有期希此微功上答殊造無任云云

為揚湖南謝設表

臣某言中使某乙至奉宣聖旨賜臣長樂驛設者恩榮

特殊宴飲斯及顧茲厚禮猥集微躬臣某誠懼誠慶頓  
首頓首臣以多幸屬此昌期任重方隅職忝文武甘受  
素飧之刺知無肉食之謀以憂以惶寤寐無措豈謂鴻  
恩繼至豐膳爰來陸海兼陳飴醴皆設庶當奉揚聖澤  
覃布遠人流愷樂於皇風均乳哺於赤子少陳微效上  
答殊私無任感恩欣躍之至

為武中丞謝賜櫻桃表

臣某言中使某乙至奉宣聖旨賜臣櫻桃若干者天眷

特深時珍洊降寵驚里巷恩溢方圓臣某誠喜誠懼頓  
首頓首伏以含桃之羞時令攸貴况今採因御苑分自  
天厨使發九霄集繁星而積耀味調六氣承湛露而不  
晞盈昔而外被恩光適口而中含渥澤顧慙素食彌切  
自公豈圖君子所先遂厭小人之腹無任云云

謝賜時服表

祇荷寵私啓處無地臣久忝朝行歷職無效往苒星紀  
偷榮歲時不能少益聖猷以副深寄致使賊遺君父艱

難未息合處嚴憲以正國章伏以陛下恢天覆之恩廣  
地載之厚不循彝典俾同冕紱重劇丘山捧戴以入閨  
門空知夕惕裁縫而為衣服固可畫行內省疲驚將何

答效

謝賜端午綾帛衣服表

綸言曲臨寵服荐至跪捧殊錫慶躍交并臣

中謝

臣諤

典方州效微涓滴叨承大貺榮重丘山非才忝恩俯伏  
慙荷朱明啓節御府賜衣沐聖澤而溟海方深披仙衣

而鶴龜齊壽馳心向闕跼影望天慙分五嶺之憂莫副  
九重之詔臣無任云

為文武百寮請復尊號第二表

臣等言臣等前詣朝堂上表伏請復加尊號奉被還旨  
未遂懇誠拳拳顛顛不勝大願臣等伏以崇明號昭聖  
德爰自中古實為上儀以至於我祖宗莫不膺茲典禮  
伏惟皇帝陛下有廣運之德弘照微之仁燭幽以明威  
遠以武惠澤之被誠浹洽於八方英聲之揚宜越軼於

千古而乃久為抑損以守謙恭事有曠而不遵禮有闕而未備臣等又以為不私於己是謂至公有美之而莫敢辭有非之而莫敢隱必推於物而順於人既以徇於羣心又思叶於中典此皆聖人之事也且夫虛而失實則誇耀而誣質而不華則朴畧而固所以王度資於潤飾帝者務於恢崇將以法日月之昭明配天地之廣大聳遠方之觀聽兼前代之軌模然後表其全功謂之盡善不可以方當陛下臨位羣臣在廷而使鴻名不彰盛

典猶闕既無以光昭衆美又無以丕承舊儀則臣等蒙  
恥於今獲罪於後實為大懼敢忘盡規尊號之崇願從  
羣議伏惟陛下俯迴宸睠察納愚誠不惟臣等受恩天  
下幸甚無任區區懇迫之至謹昧死重詣朝堂奉表固  
請以聞臣等誠懇誠勤頓首頓首謹言

第三表

臣等言前再上表請加尊號實以功德俱茂典禮宜崇  
然而不能鋪陳無以動悟愚誠雖竭天鑒未迴臣等誠

恐誠懼頓首頓首臣等謹按白虎通曰號者功之表也  
神農有教田事之勤燧人有興火食之利伏羲正五始  
祝融續三皇人為之名以美其事其後帝王之盛洎我  
祖宗之明咸因人心而順古道雖損益或異而表明功  
德一也臣等是以遵有國之令典採上古之遺文察人  
心於謳謠觀天意於符瑞敢以為請累表陳誠曩者運  
丁艱難時或順動陛下思成湯之罪已念周宣之側身  
去徽號而不稱垂炯戒而自儆應天以德示人以恭聞

於蠻貊戎夷告於天地宗廟是故咸知陛下之志慕義而歸仁潛感陛下之誠通靈而助順今者君臣同德上下叶心百職畢修庶官以序禮法明具教化流行方內歡康天下寧一四方遵業萬彙樂生嘉應休徵神物靈貺形於草木著於星辰而辭之以仁壽未臻至化猶鬱遂使德誠可紀名號未崇不告於神明不示於殊俗將何以知陛下之哉難將何以表陛下之致乎下無以威於四方上無以報於九廟其不可一也淳古之至化邈

而不足烈祖之盛儀廢而不續其不可二也庶正羣官  
宗室支屬西土耆長太學諸生黃冠之倫緇衣之侶萬  
衆伏闕彌旬織路而乃不從人心以違公議其不可三  
也守謙恭卑讓之志忽光大宏遠之圖臣等誠雖至愚  
以為大謬伏以常久之德貞夫一也元始之義善之長  
也并包覆露天之大也清靜玄默道之妙也睿知之周  
物不可以不稱夫聖也妙算之無方不可以不稱夫神  
也行仁義修典法歌詩頌考文章不可以不稱夫文也

却戎夷剪暴逆邊兵之整禁衛之嚴不可以不稱夫武也而合於唐堯乃聖乃神乃武乃文之德臣等謹稽之乾符叶於古典侷德澤之廣配功業之崇昧冒萬死伏請上尊號曰貞元大道聖神文武皇帝臣等竭其精誠發於交感無以迴日其能動天無任屏營悃懇之至謹復詣朝堂奉表固請以聞

及大會議國子祭酒韓洄請歷數近日徵應祥瑞故又改其文如後表

又伏見陛下以今年四月以來方當雩祭之修而有旱  
備之請纔愆期而未害於物深軫念而將卹其人氣潛  
通而交感以和澤旋流而霧霈斯遠由是風雨時而霜  
電不降稼穡茂而蝗螟不生農功以成年穀大熟休祥  
數見福應屢臻仁木連理而垂陰嘉禾同穎而挺秀壽  
星舒景炎之盛芝草布葩英之重白麈凝彩而雪輝蒼  
鳥取象於天色將徧於郡國相繼於歲時右具如表

為裴令公舉裴冕表

大厯四年十二月戊戌裴冕  
卒八年公始生當無此表或

云其先人為

郭令公作

臣某言聞忠邪不可以並立善惡不可以同道吳任宰  
詔而伍胥誅夷楚任靳尚而屈平放逐遠惟前事孰不  
痛心伏見澧州刺史裴冕忠肅溫恭道高德厚匪躬無怠有  
蹇諤之風道佐先帝驅馳靈武贊雲雷之業成社稷之  
勲程元振忌其直方遂加誣構投荒謫裔天下稱寃空  
懷醞正之悲莫雪增嫌之耻今奸邪屏退聖政大明百  
度惟貞四門以穆寰海之內元元之人莫不延首德音

思聞至化願特令追冕列在天朝俾之端揆庶察平章  
百姓處詢謀之任當變理之權必能協和萬邦致君堯  
舜臣位兼將相職忝股肱思進賢傑共熙帝載臣無任  
懇願之至

為裴中丞賀破東平表

臣某言日月得進奏官狀報逆賊李師道以某日克  
就裒戮率土臣子慶抃無涯臣聞負恩干紀者鬼得而  
誅犯順窮凶者天奪其魄不息妖孽曷彰聖功伏惟陛

下先天不違與神合契掩周宣中興之業陋漢光再造之勲靈旗四臨氛沴皆散凡在臣庶盡覩昇平伏以師道席父祖以作威苞海岳而專祿恃東秦十二之險誘臨淄三七之兵竊據一方歲踰五紀朝宗之地曠若外區封祀之山隔成異域累聖垂德曾未悛心餘孽滔天果聞折首遂使云亭有主知玉牒之將封遼海無虞見石砮之已至此皆陛下神籌獨得廟畧無遺授任推盡力之誠縱含有感心之化金石可貫龜筮必從克成不

戰之功遂洽無為之理臣謬司戎旅遠守方隅愧無橫  
草之功坐見覆盆之泰抃蹈歡慶倍萬恒情

賀赦表

臣某伏奉某月日恩制大赦天下一人有慶百度惟新  
戴天履土罔不欣抃某聞天地成功施雨露而育物帝  
王繼統昇日月以垂曜羣品資始萬方文明伏惟陛下  
嗣守鴻業光膺駿命淳化均於四序大德合於二儀保  
寧社稷光宅區宇弘孝慈以御下崇恭儉以垂休恩覃

溪洞事貫千古况乃順時布政乘春導和敷作解之澤  
宣再宥之典九族既睦四門廣闢而又洗滌幽繫雷雨  
之施也歸還流竄羅網之釋也移叙貶黜覆載之仁也  
蠲除逋債政理之源也褒寵勲賢激勸之方也廢金寶  
之貢有以彰儉德搜遺逸之士有以表至公元勲宿將  
賞延子孫庶尹卿士榮周存歿廣直言之路啓進善之  
門德超虞夏道掩軒頊必將平一殊俗發揮大猷億萬  
斯年永荷天緒臣謬當任用守職藩維不獲奔趨闕庭

親覩盛禮感悅歡抃倍萬恆情

宋

進刑統表 實可象

臣聞虞舜聰明始恤刑而御物漢高詒達先約法以臨人蓋此丹書輔於皇極禮之失則刑之得作於良而敝於貪百王之損益相因四海之準繩斯在如銜勒之持逸駕猶郭郭之域羣居有國有家其來尚矣伏惟皇帝陛下寶圖攸屬駿命是膺象日之明流祥光於有截繼

天而王垂洪覆於無疆乃聖乃神克明克類河圖八卦  
惟上德以潛符洛書九章諒至仁而默感哀矜在念欽  
恤為懷網欲自宥而疎文務從微而顯乃詔執事明啓  
刑書俾自我朝彌隆大典貴體時之寬簡使率土以遵  
行國有常科吏無敢侮伏以刑統前朝創始羣彥規為  
貫彼舊章采綴已從於撮要屬茲新造發揮愈合於執  
中臣與某官臣某等俱效檢尋庶無遺漏夙宵不怠綴  
補俄成

云

云

臣等幸遇文明謬參憲法金科與妙比虧

洞達之能丹筆重輕徒竊討論之寄將塵睿覽惟俟嚴  
誅

謝賜衣表 楊大年

解衣之賜猥及於下臣挾纊之仁更均於列校光生郡  
邸喜動轅門伏以皇帝陛下誕膺元符恭臨大寶惠務  
先於逮下志惟在於愛人鳥獸毳毛甫及嚴凝之候衣  
裳在笥爰推賜予之恩在渙汗之所沾雖容光而必照  
如臣者任叨符竹地僻甌吳奉漢詔之六條方深祇畏

分齊官之五服忽荷頒宣纂組極於織華純綿加於麗  
密璽書下降切窺雲漢之文驛騎來臨更重皇華之命  
但曳婁而增惕實被服以難勝矧於戎行亦膺天寵干  
城雖以皆無汗馬之勞守土何功獨懼濡鵠之刺仰瞻  
宸極惟誓糜捐

謝直集賢院表

夏子喬

北門禁省給青簡以試言東觀直廬降紫泥而命職莫  
道假人之刺彌彰遇主之榮竊以承明設待詔之官實

漢朝之芳潤麗正啓修書之院乃唐氏之英華濬圖書  
之淵做龍鳳之宇自非弓裘繼世章句名家通授羲畀  
妣之靈篇閉書笏珥彤之故事則何以繼成康之美頌  
考宣武之懿文陪法從於甘泉奉宸游於屬土况當聖  
日允屬簡求如臣者學不傳經文非近史青青子珮雖  
見刺於勞心翹翹錯薪亦濫期於刈楚筮仕勝衣之歲  
薦名象日之畿方博帶以觀光遽墨衰而泐牒尋遇國  
家誕敷尺詔增廣六科方棲枳以徒勞遂上封而自薦

始較文於鰲苑旋試可於鼎司亟趨文石之墀遂忝延  
英之問擊轅度曲敢望於九成縈帶分墉俄登於百雉  
陞象河之屬吏佐分虎之方州爰受代於瓜時遂歸朝  
於幄坐典陳陳之粟閱山委之丘區從九九之車總絲  
棼之案牘暨還衡睢壤舍爵太宮既諧引籍於金閨將  
佐于蕃之熊軾又慮沉迷簿領廢墜簡編負公朝振舉  
之科辜聖王詳延之意遂殺青而奏技果出綉以推恩  
禁林俾試於雕蟲書殿遽令於抱槧閱上帝之冊府目

眩星辰登道家之蓬山足踐雲氣奉長者之餘論與先生而並行分直石渠地接嚴更之守縱觀金匱門連著作之廷載惟螻蟻之軀莫報乾坤之賜恭惟皇帝陛下事寢廟以至孝奉靈祇而克誠流鴻藻於絕垠鑠景炎於徃號以文明而行健體柔克以居高縱觀唐漢之大猷備舉黃虞之故實睿藻和而六同韻天章麗而五色飛恢崇務廣於斯文獎擢不遺於小道遂使至孤之士獲塵非次之恩東陵遽擬於西山羔裘遂登於狐腋歌

衛風而合雅驚齊紫而雜良誠當潔節於素絲敢不盟  
心於白水益三緘而出話彌九復以窮經永冰淵惕厲  
之心奉日月照臨之鑒庶追素飡之謗仰酬明主之知  
媿懼所深兢惶不已

賀南郊大赦表

宋子京

帝儀訖饗朝渙推慈飛驛疾傳庶邦叢慶切以天郊之  
重國制有常凡萬乘躬行必三歲間往不煩不怠由列  
聖而持循以妥以虔合諸神而哀對睿圖累盛縟典勤

修恭惟皇帝陛下纂大合華執中布度抵金璧之珍玩  
率儉示人收霜電之嚴威措刑於下克勵明德格於皇  
穹交薰大和冒我羣品顧懷時億瑞應日來亟歲上儀  
若祇舊典戒期百執頒詔九州曳雲威之徜徉服翠蚪  
之泮渙殊庭一獻諸祐徧躋遂自陽靈之宮往會天元  
之旦羽旄四合垓陞參登上壁左琮之華合祛而信祝  
祖蒞宗題之次更侑而迪嘗拜嘉胙於席垂列欽柴於  
雲表靈心合答熙典備成然後還坐中天之闡普肆隨

風之澤改頌大號崇冠初元昭神之祥祈命惟永賞功  
赦罪已責逮瘵咸與惟新牖民衷而遷善聿懷多福道  
帝祉於繇區盛際有光彞倫咸賴臣饗官舊吏殫見往  
朝或不愛牲玉為恭殊非明薦或所過租賦為復蓋出  
重勞語昔罕全訂今絕擬所恨清塵在望自苦周南之  
留紫橐仍持不與甘泉之從第班思諭均泱歡棕

代人乞出表

臣聞物勝於權則衡為之殆馬竭其力則御速於顛蓋

以器循量而易施材過求而難勉是以功名之際惟髦  
士可居彊力之容匪暮年勝任將傾危懇敢援斯言竊  
念臣本以丘樊託于經術幸逢先烈超備從官服上教  
之彌文因至愚而取信出入丹禁無所建明履歷藩宣  
茂聞條教尊號皇太后陛下尊號皇帝陛下奉承謨訓  
過聽空疎簡服在庭蕪容如地雖百度之治咸使與聞  
每萬幾之餘常參勸講七周成歲訖乏寸長惟君知臣  
足以驗其無用惟國有典不可違於黜幽且自知甚明

內省尤熟以一介之鄙賤丁千載之會昌邑戶殫錢非  
祿之不厚高冠大佩非位之不崇同僚皆賢非志之不  
合處奏多可非言之不從固常勉服攸箴謹修爾職答  
乃聖之眷遇為斯文之寵光其如犬馬齒衰桑榆景薄  
中年則病奪其壯晚節則務傷於神辨色立朝足居多  
於跛倚書思記命目不辨於馬烏而臣頃自去秋願辭  
近職上恩不聽寵渥就加逮暵勉以及茲且蠢昏而益  
甚事皆忘誤疾愈尪瘠顧四體之已疲宜一辭而後止

重念臣之鄉籍世占鄆州既託粉榆薄營產利不勝首  
丘之志願諧剖竹之行庶及餘年聊蘇疲瘵况前朝邢  
曷本貫曹州亦自禁廬得臨鄉郡臣今所請似有前規  
伏望陛下念舊物之不可遺憫孤生之老且至特垂寬  
詔俾守先廬諒亦大君進退之間微臣止足之分萬無  
纖介可貽累於至仁一切便宜尚力思於卧治仰干睿  
鑒伏俟嚴誅

謝衣襖表

冬簷乘辰裘官著令疾馳使驛臨撫塞屯並頒齊筭之  
良均狹吳繇之煖被躬且吉束帶有華伏惟皇帝陛下  
至德誕敷深仁普愛念官師所以卒歲恐天下有受其  
寒据泰軫窮當舒慮慘况淒其戒序必惻然動心特以  
濱寒沍嚴持兵戰露句傳温詔緘貯紋袍爛然晝鮮煦  
若春至矧部校什長賜各有差僻壘窮郭悅而忘苦振  
裾交林聯袂相趨和氣暢肢顧折膠而何畏大恩壓已  
憂稱服以為難有可仰酬不知輕隕

代陳州章相公乞致仕第一表

臣聞器有所極強之者必顛志有所安違之者將敗是  
故智士不窮量以邀受仁君無拂願以責功內顧危悰  
敢援茲喻伏念臣姿力駑下術畧迂疎蒙幸中人之材  
待罪宰相之府寵與時進負隨日深謀謨弗良彫柲相  
踵羌夏有未纓之醜闕陝多無聊之人萑盜跳梁篁首  
煽訥杼軸罄於編戶杼皮蠹於遠方上貽焦勞外謹謗  
誚咎不臣執罪將執歸比者荐瀝肝膺願乞骸骨冀蒙

不職之竄以贖安用之辜尊號皇帝陛下包納荒遐親  
喻戒救須訖郊丘之享乃許印綬之還褒亮所加諄慈  
兼至臣此時外迫大誼中忘至愚敢優游以自安輒皇  
恐而視事然而智慮淺局年鬢頽侵短臂屈長袖之前  
疲足困新羈之左覲然尸位條又彌年所賴陛下以百  
姓為心天下為度捨末爭而納戎帳之款捐滯積以撫  
遼衽之和克展上儀遂布鴻慶永惟橫目之庶方就覆  
盂之安臣之及茲可謂天幸過此不止其如罪何雖大

度之見容在輿議之難遏抑又聞當退而進者侮必及  
宜黜而用者傷必多高位乃身殃之媒厚祿為衆怨之  
舍借令臣冒厥明戒苟留上司玷廊廟之儀刑被史家  
之貶戮死有餘咎仁弗忍為伏望察如丹之誠憐指景  
之慕遂容納政早獲省私亦不必窮喋喋之言乃蒙矜  
恤第可惜以齷齪之謹妨用俊良虔冀曰俞誓無但已

賀生皇子表

具官臣祁上言寶祐叢休天支毓秀慶騰秘禁歡溢神

州恭惟皇帝陛下受命溥將凝圖丕赫乾綱獨運根乎  
克念之虔簡素所安表於不勉之懿且復輕刑薄賦重  
穀厚民一方少饑則速馳使節白金稍乏則輒續禁錢  
民用靖嘉神罔恫怨是以上帝歆佑三后顧存貽美孫  
謀昭衍無疆之烈歸功元首茂啓多男之祥誕協仲商  
挺生哲嗣星弧具禮天第交華惟翕闢之儲英固覃訃  
而絕異迭聆詔諭並仰獻儀笏相趨忭吾君之有子  
珪璋流愛宜天下之繫心臣始去近聯遽承吉語賡歌

綿陔早知周德之遐參祝祠禡罔逮漢臣之幸臣無任  
瞻天仰聖不勝懼忭屏營之至謹奉表稱賀以聞臣祁  
頌首頌首謹言

駕幸河北起居表

楊大年

蛟矢未橐鑿輿順動羽衛方離於象魏天威已震於龍  
荒慰邊眈俟后之心增壯士平戎之氣臣聞涿鹿之野  
軒皇所以親征單于之臺漢帝因之耀武用殲夷於強  
敵遂底定於邊陲五材並陳蓋去兵之未可六龍時邁

因犯順以必誅矧朔漠王庭中原鄰壤敢因膠折之候  
輒為烏舉之謀固已命將出師克敵告廟雖呈入郢之  
機未遂下齊之願是用親御戎車躬行天討勞軍細柳  
之壁巡狩常山之陽師人多寒感恩而皆同挾纊王師  
未捷受命而孰不忘家行當肅靜塞垣削平藩落破魚  
麗之陣收督亢之圖使遼陽八州之民咸歸丕冒榆闕  
千里之地盡入提封烽烟之警常消干戈之事未戢然  
後登臨瀚海刻石以銘功陟降云亭泥金而典禮遠追

八九之迹永垂億萬之年臣忝守方州莫參法從空厲  
請纓之志慙無扈蹕之勞惟聆三捷之音遠同百獸之  
舞

汝州謝上表

沉疴初釋寵寄存臻祇命惟寅飭裝靡暇初臨郡閣獲  
見吏民揣已若驚戴恩罔措伏念臣本由單弱特稟庸  
愚以童刻之微能際帝圖之亨會驟參綸掖獲草芝函  
屬以堯德彌文漢辭爾雅雲章有爛諒黼黻以何施天

律惟精亦哇咬之罔棄居常摩厲徒益空疎俄踐內庭  
預司密命值皇闈之有慶扈清蹕以多歡窺雲瑞於封  
中聽棹歌於汾曲四巡第頌誠辨麗之絕聞二豎興妖  
致冥煩之坐邁偶嬰沉痼遂劇支離因請急以歸寧遽  
迷魂而不復率由蹇否自抵困窮矧以蕞爾之軀孰然  
去職羈孤至甚毀嫉居多嘖有煩言實盈庭之可畏豁  
然大度終如地以見容比及痊平果蒙齒叙此蓋皇帝  
陛下仁深慘怛德茂欽明軫舊故以興懷俾肖翹之遂

性特加采錄令獲便安况臨汝舊邦陪京近輔姬文之  
化所及首載聲詩地官之籍攸分實繁兵賦土多巖險  
民或惰游置使勸農抑惟令典分條察俗蓋有新書臣  
亦夙侍凝嚴潛窺律度敢忘瘁盡以奉化成然念臣早  
以斷斷之薄材獲齒振振之近列典司訓誥就望威顏  
讀銘字於湯盤時瞻景式載史言於董筆獲次舊聞舛  
命遘屯榮階絕迹酒泉素願敢望於生歸麗正殘編幾  
成於死恨今者星畿接畛竹使長人預方國之頒書稟

天臺之布憲水深土厚足養於槁骸晝訪夕修冀無於  
秕政親末光而彌阻感再造以難勝

謝除使相判相州表

韓魏公

宰職隳功莫副宵衣之治鄉邦得請重叨畫錦之行被  
恩典之特優顧人言而甚愧伏念臣早由科第遂玷寵  
榮不圖翰墨之進身自竭涓塵而報國備員諫諍幾不  
免於竄投奮命圍疆實荐罹於艱阻獨特聖神之眷惟  
開援助之言仁宗皇帝知其守以孤忠謂可屬之大事

慶歷之始已擢貳於樞機嘉祐之中乃進登於宰輔俄  
膺顯任益荷殊知當英廟之承祧逮聖人之嗣服稠重  
遭會罄竭愚庸惟知社稷之安豈顧家宗之末然而萬  
方多務一紀妨賢為國持平敢自私於輕重裁人所慾  
固難免於愛憎加疾疹之嬰纏苦形神之耗敝勉訖因  
山之禮懇陳上印之宜伏蒙陛下念犬馬之力易衰廓  
日月之明為照不罪再三之請亟垂開可之音進秩地  
官剖符扮社建高牙之重既疏淮海之封增故里之光

仍襲貂蟬之舊叨塵之甚今古疇偕敢不思盡瘁於寢  
興泯寘懷於內外在邊在庭之責惟驅策以當前益堅  
益壯之心至糜捐而後已臣無任瞻天仰聖感荷屏營  
之至謹上表稱謝以聞

謝賜生日禮物表

王禹玉

臣某言月日臣生日伏蒙聖慈賜以禮物者聖言如綉  
傳溫厚於芝函邦錫自天發光華於蔀屋榮踰素望媿  
溢常涯伏念臣以固陋之資被睿聖之眷迺預塵於政

路復冠列於台司歲月崢嶸而屢更精力勤勞而莫補  
速譏讒於衆口媿叨列於前人逮茲苟完安有橫冀載  
及桑蓬之序方深岵岵之思念莫報於劬勞敢饗承於  
恩禮良金燭乘嚴寶勒於天駒藻帛絢文離華章於筭  
服豈繫蕃庶併及衰遲此蓋伏遇皇帝陛下敦舜孝以  
儀民軫堯仁而冒物特厚柄臣之遇過頒御府之珍交  
孚曲記於賤生博愛乃容於濫賜拜漢庭之寵雖慙稽  
古之功報周雅之章願上如岡之壽臣無任仰天感聖

惟忤屏營之至上表稱謝以聞

辭起復表

富彥國

喪次啣哀甫終卒哭使華傳命繼至敝廬心積驚憂情  
深屠烈雖屢傾於丹懇尚未錫於俞音天遠莫量物微  
難動不避褻煩之咎更陳隕絕之詞必冀神聰俯從哀  
請伏念臣早懼家難偏奉母慈猥以蠢愚最鍾愛育享  
祿未幾遽纏風樹之悲報德永違徒懷霜露之感寢苫  
枕塊而適抱至痛食稻衣錦則若為自安實非人情尤

秦邦制况今中外無事左右得賢共輔聖明之期安有  
隳曠之務曲蒙下詔更起孤臣在陛下馭國之方蓋欲  
不遺於舊物於朝廷敦化之道必恐有誤於蒼生何須  
稽故事以遂前世之非正可存禮經以圖今日之善行  
之即是義不為難豈惟於陛下有復古之風抑亦俾愚  
臣得事親之道一為匪戾兩得其宜兼臣悲傷之餘衰  
病交至精力已耗神觀未還假使充員豈堪應務苟令  
終畢於祥禫庶幾稍復於幹魂得此從容可備驅策伏

望尊號皇帝陛下日月臨照天地包容盡母氏平生之  
恩憐人子罔極之苦曲矜末志得滿鉅憂生意凋零或  
尚未捐於溝壑清光咫尺終期伏望於雲天悲感增深  
懇願兼劇

賀平河外三州表

伏以平戎韜畧靡用干戈陷敵編氓自還里閭豈特鄰  
封之效順行知鋒鏑之可消患弭一隅治形四海伏以  
善戰之至初無勇功神武之行亦云不殺矧西羌之叛

服如禽獸之去來始非得已而用兵終則附懷之有道  
巢穴可窮而不問邊陲安堵而自如情狀益殫款誠屢  
至遂同草面相與向風既內懾於威靈遂盡歸其俘獲  
殆非力致純以德來矧是生還率當死節度湟伐木不  
煩充國之謀謁廟賜田如見子卿之返伏遇皇帝陛下  
上仁蕪覆盛德維新小二漢之邊功盡三王之能事眷  
惟士伍偶被聲明鞅譯在途既奉君臣之義衣裳改衽  
復從父母之邦邊堠告寧人情底豫豈冀七旬之格是

為千載之逢臣頃預政機親聞睿算比分憂寄獲觀成  
功再拜奉觴雖阻漢庭之列大書作策永為宋史之光  
感頌之私倍萬常品臣不勝欣躍屏營之至謹奉表稱  
賀以聞

賀皇長子封公表

王君貺

具官臣某言伏覩某月日聖旨封皇長子為某公者伏  
以建親授社屏翰於王家封子維城安疆於國幹誕揚  
休命敷告羣倫均海宇之歡心洽朝廷之大慶竊以宗

藩錫瑞賢戚分疆周列侯邦半諸姬而啓土漢有天下  
非劉氏則不王皆所以滋大本支維持宗室綿鼎數於  
穹壤固廟祏於山河屬我熙朝益隆茂典恭惟尊號皇  
帝陛下纂承皇序恢闡洪圖善迪孫謀適遵祖構乃眷  
元良之重已昭岐嶷之英肇啓南圻崇加上壤離明震  
豫知帝緒之無疆海潤星暉戴吾君之有子臣居留近  
甸迹遠彤墀側聽恩章愈增忭懌臣瞻望闕庭無任雀  
躍屏營之至謹奉表稱賀以聞


廣德軍謝表

錢君倚

曠官罪大奪位秩者彌年享帝恩隆回雷霆於數日籍  
還省部身忝軍牙祇荷寵靈伏深感懼伏念臣江湖賤  
士巖穴孤生出逢聖辰外備法從學非深造粗能明致  
治之方心不苟容故欲罄事君之節義當有在雖富貴  
誘之而不回職所宜言雖斧鉞威之而益厲果由官守  
遂正典刑放之窮山所以苦其心志授之散秩將以餓  
其體膚期沒齒於蒿萊敢希榮於軒冕豈圖寬宥尚被

采收死灰於是乎復然白骨於焉而再肉近鄉守壘上  
冢還家百計安閒一身安逸使其自請未必能然此蓋  
伏遇皇帝陛下化極文明恩漸動植如天之覆遠則彌  
周如日之中幽無不燭遂容駑質猥玷鴻私况是桐川  
獨居江左俗雖僻陋而稱風物之良地雖褊迫而有山  
林之勝養茲不肖孰曰匪宜惟修省所以飭躬惟忠勤  
所以報國有民有社固恪奉於訓詞為子為臣方益堅  
於素節誓殫犬馬仰答龍光臣無任瞻天仰聖感荷屏

營之至謹奉表稱謝以聞



唐宋元名表卷上之一